

Nêf **Camilla Stelitano** di Codroip e **Michele Calligaris** di Romans dal Lusiņç a àn vinciût la cuinte edizion dal concors inmaneât dai Colonos.

» DI **CHRISTIAN ROMANINI**

Nêf Camilla Stelitano e **Michele Calligaris** a son i vinciadôrs de edizioni 2014 di 'In trê riiis'. O vin contatât **Federico Rossi**, diretôr artistic de manifestazion, par comentâ il sucês dal concors.

Rivade ae cuinte edizion, cjapant spont dal gjenar rindût famôs dal scritôr francês **Felix Feneon**, la competizion leterarie - la premiazion e je stade fate lunis ai 11 di Avost - e domande ai concorints di contâ une storie in 180 batudis. Chest an i partecipants a son stâts ben 24, tra sezion 'zovins' fin ai 16 agns e 'grancj' fin ai 35 agns, e lis oparis presentadis a son rivadis a 42, ven a stâi un numar cuasit dopli rispjet a chei che a son rivâts l'an passât.

Ce isal che us a sodisfat di plui?

"E je stade une buine partecipazion di autôrs, ancje se la cualitât gjenerâl no je stade al massim. La flession che o vevin vude te edizion passade nus veve preocupât, cheste volte si tratave di capî se il concors al interessave ancjemò la platee dai zovins. Di chest pont di viste la rispueste e je stade positive e o sin sodisfats, ancje se o vin di impegnâsi a promovî di plui la iniziative cu la colaborazion dal Arlef".

Daûr dai numars, i zovins a vuelin scrivi: ce pensistu di chest?

"Ai zovins si à di ufrîur tantis



Carlo Tolazzi e il premiât Michele Calligaris

Par contâ alc a bastin trê riiis

ocasionis diferentis che ur permetin di afezionâsi al furlan, tant di sintîlu come une espression proprie, che a puedin meti in zûc in maniere naturâl, ma ancje in forme creative. Al è dal sigûr un biel segnâl se desenis di lôr a acetin la sfide estreme, che no je par nuie facil come che al podarès someâ di prin bot, di contâ une storie cun pocjis peraulis".

Parcè jerial in finâl dome Michele Calligaris te sezion dai 'grancj'?

"La storie che à vinciût e je di un zovin di 31 agns di Romans dal Lusiņç. E conte un fat storic che al è atuâl par vie dal centenari. E dîs cussì: 'Le àn screade cuant che un Princip al copà un princip: in tic e tac, cuntun ton, vele finide la

Belle Époque. Agârs e cumieriis semenadis di muarts, filistrins e lagrimis".

Pensaiso di publicâ une antologjie dal concors?

"Za dal inizi di cheste aventure o vin metût in cantîr il progjet di documentâ cuntune bieles publicazion lis miôr contis. A 'nd è tantis di bielonis, e o pensi che il timp al sedi madûr. Dut câs lu deciderin cul coinvolziment dai components de jurie e dal president **Carlo Tolazzi**".

Par viodi il rest dai calendari dai apontaments si pues visitâ il sît www.colonos.it o telefonâ al 3481015830.

✉ ilfriuli@ilfriuli.it

■ **BOSC DI MUSEIS**

A proposit di Europe, finance e popui

Intal Continent Vieri a I cressin lis istancis che a domandi la indipendence e che a discutin sul teme "Europe dai popui o Europe de Finance?" dulà che il podê dal Euro al somee scjafoiâ i principis ideai che le àn fate nassi.

Di dut chest malcontent, che al inflame il dibatit politic in tantis regjons europeanis, si fevelarà ancje in Cjargne, vinars ai 22 di Avost, li dal Bosc di Museis a Ćiurcuvint aes 8 e mieze di sere.

Su la taule ancje lis cuiestions ambientâls, su dutis chê dal eletrodot cu la Austria, ma soredu il Kosovo, la Scozie, la Catalogne, la Sardegna e il Friûl e la lôr identitât locâl.

A fevelaran **Guglielmo Cevolin** de Universitât dal Friûl e de associazion Historia e **Giorgio Da Gai**. Al moderarà **Daniel Spizzo** de Universitât di Triest, lassant spazi ancje ai intervents dal public e dai amnistradôrs locai e regjonai.

SCOLTADIS DI DRIUS

Dirit di vivi

"Marie, viôt ca; passe 50 euros di midisinis". Pobem, no ajal dirit di vivi ancje el speziâr? Ma sêtu mat, les butitu tes scovazzis? "O varai ben dirit di vivi ancje jo!"



Euronews informa

Il declassament dal Uffici scolastic regionâl.

Fontanini, "La Zonte regionâl no à fat nuie par mantignî une figure clâf par une Regjon speciâl"

"Il declassament dal Uffici scolastic regionâl al svîlis la nestre Regjon tal so status di Regjon a statût speciâl". Al è convint il president de Provincie Pietro Fontanini che, daspò il declassament a secont grât dal Dirigjent scolastic regionâl, al torne su la facende e al bachete la Regjon par no vè fat nuie par "mantignî une figure fuarte dal pont di viste istituzionâl". Pal president Fontanini, in particolâr, il proviodiment "al samee cence sens intune Regjon tant che la nestre par numar di abitants e students. Condivisibii i criteris che a àn puartât al tai dal dirigjent scolastic in regions tant che il Molîs, Umbrie e Basilicade ma dal dut cence sens intune regjon tant che la nestre dulà che a son problematichis specifichis, espression di un teritori "speciâl". "Il declassament dal Uffici scolastic regionâl - al zonte l'assessôr ae istruzion Beppino Govetto - al imberdee il completament de riforme te scuele secundarie superiôr; al rint dificil risolvî lis fuartis problematichis dai istitûts de montagne che a sufrissin



di un cambi dai presidis prejudicant la cualitât de scuele". E sul declassament dal Uffici scolastic regionâl, dal principi dal an, il Consei provinciâl al à aprovât ae unanimitât un ordin dal di che al à viodût un acet trasversâl dai schiriments. "La mancjanca sul nestri teritori di un dirigjent di prime fasce - al

precise Govetto - e va a indebilî in maniere pesante il sisteme scolastic regionâl che al presente une schirie di problematichis di frontâ: soredu la riforme de scuele secundarie superiôr che e va completade e la atuazion di un plan trienâl de istruzion e formazion tecniche superiôr e dai pôi tecnics-professionâls. A chescj aspjets di frontâ - al sclaris Govetto - si zontin lis dificoltâts leadis ai istitûts sore e sot dimesionâts e il probleme des scuelis di montagne che a domandin une soluzion che no si pues plui rinviâ. Situazions, in fin dai fats, che a domandin la presince di un dirigjent fuart dal pont di viste istituzionâl cemût che al è stât fin cumò". Duncje il riclam di Govetto ae specialitât regionâl. "Chest proviodiment ministeriâl - al sotlinie l'assessôr - al svîlis la nestre specialitât regionâl impedintus di vè un confront diret Regjon FVJ - Ministeri de Istruzion: o dovaressin passâ traviere l'uffici scolastic interregionâl cun sede tal Venit. Il FVJ cun di plui - al zonte Govetto - al ven paragonât a regions a statût ordenari cuntun numar di students un grum inferior ai nestris. Une decision - al comentave Govetto - che e rive a un an di distance di une sentence de Cort Costituzionâl che e afermave cun fuarce la nestre specialitât. Sentence che e à ricognossût la specialitât linguistichie dal nestri teritori permetint di assegnâ la autonomie scolastiche ancje ai istitûts e aes scuelis secundariis cun 400 arîefs".